

4. júní 2015

Bæjarstjórn Ísafjarðarbæjar ályktaði þannig á fundi sínum 7. maí síðastliðinn:

„Bæjarstjórn Ísafjarðarbæjar tekur undir með Landssambandi smábátaeigenda um mikilvægi þess að auka heildaraflann í strandveiðum. Með aukningu strandveiðipottsins aukast umsvif og atvinna í sjávarbyggðum um allt land. Arður af þessum veiðum verður að mestu eftir í heimabyggð vegna launa og keyptrar þjónustu.

Þessar veiðar eru sérlega mikilvægar fyrir Vestfirði. Ólíkt er það gleðilegra að sjá afla af Vestfjarðamiðum koma á land á Vestfjörðum en að sjá honum siglt beina leið af miðunum án þess að eiga hér nokkra viðkomu.

Vestfirðingar allir hafa þurft að taka á sig þá skerðingu sem verið hefur í þorskveiðum í langan tíma auk afleiðinganna af grimmúðlegum samfélagsáhrifum kvótakerfisins. Það er ekki nema sanngjarnt að þeir fái hlutdeild í aukningu þegar hún er möguleg.

Krafa LS um 2.000 tonna aukningu er að mati bæjarstjórnar full hógvær og væri miklu fremur nauðsyn að auka strandveiðipottinn í 20.000 tonn en ekki aðeins 10.000 tonn. Sérstaklega þarf að huga að aukningu á Vestfjörðum í þessu sambandi, þar sem ásókn í strandveiðar er mest, og víst er að fáar byggðaaðgerðir myndu vera jafnskjótvirkar og óumdeildar.

Um er að ræða einfalda og sanngjarna byggðaaðgerð þar sem smærri sjávarbyggðir njóta nálægðar við fiskimiðinu, ólíkt því sem leiðir af núverandi kerfi samþjöppunar. Arðurinn af veiðunum smábáta rennur þannig í mun meiri mæli til þeirra samfélaga sem ættu að njóta nálægðar sinnar við fiskimiðin og til þeirra einstaklinga sem raunverulega skapa verðmætin.“

Gísli H. Halldórsson

Bæjarstjóri Ísafjarðarbæjar